



Parlamentarna komisija odgovorna za reviziju
Parlamentarno povjerenstvo odgovorno za reviziju

Парламентарна комисија одговорна за ревизију

Broj: 04/1-02-689/26-3
Sarajevo, 27. 2. 2026. godine

ČLANOVIMA PARLAMENTARNE KOMISIJE ODGOVORNE ZA REVIZIJU

Dana 26. 2. 2026. godine, održana je 28. sjednica Parlamentarne komisije odgovorne za reviziju Parlamenta Federacije BiH (u daljem tekstu: Komisija). Sjednici Komisije prisustvovali su svi članovi Komisije i samim tim ispunjeni su svi uslovi za punovažan rad u pogledu kvoruma i odlučivanja. Pored članova Komisije, na 28. sjednici Komisije prisustvovali su Mirza Kudić, generalni revizor, Nina Džidić zamjenica generalnog revizora i Marijana Miličević, sektorski rukovodilac u Uredu za reviziju institucija u Federaciji BiH.

Predsjednik Komisije je predložio **dnevni red**, koji je jednoglasno usvojen, a koji glasi:

1. Usvajanje zapisnika sa 27. sjednice Parlamentarne komisije odgovorne za reviziju,
2. Prijedlog izvještaja Parlamentarne komisije odgovorne za reviziju o revizorskim izvještajima revidiranih subjekata i korisnika budžeta Federacije Bosne i Hercegovine za 2024. godinu,
3. Izvještaj o obustavi finansijske revizije ustanova socijalne zaštite F BiH za 2025. godinu,
4. Tekuća pitanja.

Na osnovu člana 44. Poslovnika Predstavničkog doma i člana 41. Poslovnika o radu Doma naroda, a u vezi sa članom 54. Poslovnika Predstavničkog doma Parlamenta Federacije BiH i člana 52. Poslovnika o radu Doma naroda Parlamenta Federacije BiH, Komisija podnosi sljedeći:

IZVJEŠTAJ

1. **Usvajanje zapisnika sa 27. sjednice Parlamentarne komisije odgovorne za reviziju**

Komisija je razmatrala zapisnik sa 27. sjednice Parlamentarne komisije odgovorne za reviziju i jednoglasno ga usvojila.

2. **Prijedlog izvještaja Parlamentarne komisije odgovorne za reviziju o revizorskim izvještajima revidiranih subjekata i korisnika budžeta Federacije Bosne i Hercegovine za 2024. godinu**

U uvodnom dijelu izlaganja, predsjednik Komisije je podsjetio članove na ključne parametre prijedloga izvještaja, koji obuhvataju opće podatke o ukupno izvršenim revizijama. Naglašeno je da je Ured za reviziju institucija u Federacije BiH, postupajući u skladu sa zakonskim rokovima, do 30. septembra 2025. godine Parlamentu Federacije BiH dostavio: 69 izvještaja o finansijskoj reviziji, 54 izvještaja o praćenju postupanja po preporukama iz prethodnih perioda i 4 izvještaja revizije učinka.

Predsjednik je potom ukazao na završni dio dokumenta koji sadrži 13 prijedloga zaključaka. Podsjetio je da na prethodnoj sjednici nije postignut konsenzus oko pojedinih prijedloga zaključaka, te je tom prilikom utvrđeno da članovi komisije do narednog zasjedanja preciziraju i dostave prijedloge putem elektronske pošte sekretarima komisije.

Nakon uvodnog izlaganja, predsjednik Komisije pozvao je članicu Mirjanu Marinković-Lepić da obrazloži prijedloge zaključaka koje je dostavila.

Nakon detaljnog obrazloženja dostavljenih prijedloga zaključaka, predsjednik je otvorio raspravu. Po zaključenju rasprave, predsjednik je pozvao članove Komisije na pojedinačno izjašnjavanje o predmetnim zaključcima.

- Prvi prijedlog zaključka nije usvojen. Prilikom glasanja, 13 članova izjasnilo se “protiv”, dok je 1 član glasao “za”.
- Drugi prijedlog zaključka nije usvojen. Prilikom glasanja, 13 članova izjasnilo se “protiv”, dok je 1 član glasao “za”.
- Treći prijedlog zaključka nije usvojen. Prilikom glasanja, 9 članova se izjasnilo “protiv”, 4 člana su glasala “za”, dok je 1 član bio suzdržan.

Predsjednik Komisije je potom otvorio raspravu o Prijedlogu izvještaja Parlamentarne komisije odgovorne za reviziju o izvještajima revidiranih subjekata i korisnika budžeta Federacije Bosne i Hercegovine za 2024. godinu sa zaključcima koji su utvrđeni od strane Komisije. Nakon zaključene rasprave, predsjednik je pozvao članove na izjašnjavanje, te konstatovao da je Izvještaj usvojen sa 13 glasova “za” i 1 glas “protiv”.

3. Izvještaj o obustavi finansijske revizije ustanova socijalne zaštite F BiH za 2025. godinu

Predsjednik Komisije je u uvodnom obraćanju obavijestio članove Komisije da je od strane Ureda za reviziju institucija u Federaciji BiH dostavljen Izvještaj o obustavi finansijske revizije ustanova socijalne zaštite Federacije BiH za 2025. godinu.

U cilju detaljnijeg pojašnjenja razloga i okolnosti koje su dovele do obustave postupka, predsjednik je dao riječ predstavnicima Ureda za reviziju institucija Federacije BiH.

Predstavnik Ureda je članovima Komisije prezentirao obrazloženje dostavljenog izvještaja, sa fokusom na ključne prepreke koje su onemogućile daljnje provođenje revizije u navedenim ustanovama tokom 2025. godine. Istakli su da je ključni razlog nemogućnosti provođenja

revizije u ovim ustanovama neusaglašenost člana 69. stav 4. Zakona o ustanovama sa Zakonom o budžetima Federacije BiH.

Nakon iscrpnog obrazloženja predstavnika Ureda za reviziju, članovi Komisije su uvažavajući prezentirane razloge i stručno mišljenje Ureda za reviziju primili na znanje predmetni Izvještaj.

4. Tekuća pitanja

Povodom ovom tačkom dnevnog reda, član Komisije Mirsad Zaimović zatražio je od Ureda za reviziju institucija u Federacije BiH, dostavljanje detaljnih podataka o izvršenim revizijama u jedinicama lokalne samouprave i pripadajućim javnim preduzećima za protekli desetogodišnji period. U svom izlaganju, izrazio je sumnju u postojanje selektivnog pristupa i potencijalnog političkog utjecaja na proces planiranja revizija, ukazujući na neproporcionalnu učestalost nadzora kod određenih subjekata, uz poseban osvrt na Općinu Kakanj i njena javna preduzeća/ustanove za 2024. i 2025. godinu.

Konstatovano je finansijska revizije Općine Kakanj i JP "Grijanje" Kakanj izvršena u 2024. godini, zatim je u 2025. godini izvršena revizija Zavoda za planiranje i izgradnju Općine Kakanj (iako je isti prethodno obuhvaćen revizijom Općine). Konačno, u tekućoj godini, Općina je podvrgnuta i reviziji učinka.

U odgovoru na iznesene primjedbe, generalni revizor Mirza Kudić je potvrdio da će Ured za reviziju dostaviti tražene podatke Komisiji. Istakao je da će, uz tabelarni prikaz, Ured pružiti i detaljnu informaciju o načinu planiranja revizija u prethodnom desetogodišnjem periodu. Naglasio je da se proces planiranja zasniva na matrici rizika, koja iako je formalno na snazi proteklih 20 godina, primjenjivati se počela tek u zadnje vrijeme.

Dodatno pojašnjenje u vezi tvrdnji g-dina Mirsada Zaimovića je pružila šefica sektora Marijana Miličević, koja je istakla da je ključni razlog za ponovnu revizija Zavoda za planiranje i izgradnju općine Kakanj, godinu dana nakon revizije Općine Kakanj, taj što Zavod nije uključen u sistem trezorskog poslovanja, što je identificirano kao rizik zbog nedostatka adekvatnog nadzora.

